



**Politička organizacija građana "Naša stranka"**

Branilaca Sarajeva 5/1, 71 000 Sarajevo

Telefon: 033 551 225; Fax: 033 551 226

E-mail: nasastranka@nasastranka.ba

Web: www.nasastranka.ba

Broj: 261/15  
Sarajevo, 01.09.2015.

**Dostaviti:**

Bosna i Hercegovina  
Federacija Bosne i Hercegovine

**Parlament Federacije BiH**

Predstavnički dom  
n/r Edin Mušić, predsjedavajući

**Vlada Federacije BiH**

n/r Fadil Novalić, premijer

Bosna i Hercegovina  
Federacija Bosne i Hercegovine  
**PARLAMENT FEDERACIJE**  
SARAJEVO

Primljeno: 02-09-2015			
Org. jed.	broj	Priloga	Vrijednost
01, 01/c	- 02 -	1167	15

01/a; 01/b  
02/a; 02/b

**PREDMET: Prijedlog zakona o zabrani negiranja, minimiziranja, opravdavanja ili odobravanja holokausta, zločina genocida i zločina protiv čovječnosti**


Poštovani,

Na osnovu člana 179, a u vezi sa članom 163. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, broj 69/07 i 2/08), dostavljam Vam Prijedlog zakona o zabrani negiranja, minimiziranja, opravdavanja ili odobravanja holokausta, zločina genocida i zločina protiv čovječnosti.

Na osnovu člana 172. Poslovnika Predstavničkog doma Parlamenta Federacije Bosne i Hercegovine predlažem da se isti razmatra po skraćenom postupku iz razloga što se ne radi o složenom zakonskom tekstu.

U prilogu Vam dostavljam tekst Prijedloga zakona o zabrani negiranja, minimiziranja, opravdavanja ili odobravanja holokausta, zločina genocida i zločina protiv čovječnosti sa obrazloženjem na bosanskom jeziku i elektronsku verziju istog.

S poštovanjem,

  
Dennis Gratz

Zastupnik u Predstavničkom domu Parlamenta Federacije BiH  
Naša stranka

**DENNIS GRATZ**

ZASTUPNIK U PREDSTAVNIČKOM DOMU  
PARLAMENTA FEDERACIJE BOSNE I HERCEGOVINE

PRIJEDLOG

**ZAKON O ZABRANI NEGIRANJA,  
MINIMIZIRANJA, OPRAVDAVANJA ILI  
ODOBRAVANJA HOLOKAUSTA, ZLOČINA  
GENOCIDA I ZLOČINA PROTIV  
ČOVJEČNOSTI**

Sarajevo, septembar 2015. godine

# ZAKON O ZABRANI NEGIRANJA, OSPORAVANJA, MINIMIZIRANJA, OPRAVDAVANJA ILI ODOBRAVANJA HOLOKAUSTA, ZLOČINA GENOCIDA I ZLOČINA PROTIV ČOVJEČNOSTI

## Član 1.

Ovim zakonom uređuje se sankcionisanje negiranja, osporavanja, minimiziranja, opravdavanja ili odobravanja holokausta, zločina genocida i zločina protiv čovječnosti.

## Član 2.

Značenje pojmova koji se koriste u ovom zakonu je kako slijedi:

1. **Holokaust** predstavlja zločin genocida i zločine protiv čovječnosti počinjene od njemačkog nacističkog režima za vrijeme trajanja Drugog svjetskog rata, koji su kao takvi priznati kroz konačne i obavezujuće odluke ili presude Međunarodnog vojnog tribunala uspostavljenog Londonskim sporazumom od 8. avgusta 1945. godine.
2. **Genocid** predstavlja zločin definiran Članom II Konvencije o sprečavanju i kažnjavanju zločina genocida od 9. decembra 1948. godine i priznat kao takav kroz konačne i obavezujuće odluke presude Međunarodnog suda pravde ili bilo kojeg drugog suda uspostavljenog relevantnim međunarodnim mehanizmima i čija je nadležnost priznata od strane Bosne i Hercegovine, ili Suda Bosne i Hercegovine.
3. **Zločini protiv čovječnosti** predstavljaju zločine definirane kao takve međunarodnim pravom i priznate kao takve kroz konačne i obavezujuće odluke ili presude Međunarodnog suda pravde ili bilo kojeg međunarodnog suda uspostavljenog relevantnim međunarodnim mehanizmima i čija je nadležnost priznata od strane Bosne i Hercegovine, ili Suda Bosne i Hercegovine.
4. **Negiranje** predstavlja svaku izjavu, radnju ili aktivnost, a naročito svaki usmeni, pismeni, audio, vizuelni ili elektronski materijal bez obzira na sadržaj, oblik ili način iznošenja ili pronošnja, kojim se negira holokaust, zločin genocida ili zločin protiv čovječnosti, a kako su ovi pojmovi definirani u ovom zakonu.
5. **Osporavanje** predstavlja svaku izjavu, radnju ili aktivnost, a naročito svaki usmeni, pismeni, audio, vizuelni ili elektronski materijal bez obzira na sadržaj, oblik ili način iznošenja ili pronošnja, kojim se osporava da se dogodio holokaust, zločin genocida ili zločin protiv čovječnosti, a kako su ovi pojmovi definirani u ovom zakonu.
6. **Minimiziranje** predstavlja svaku radnju i aktivnosti, a naročito svaki usmeni, pismeni, audio, vizuelni ili elektronski materijal bez obzira na sadržaj, oblik ili način iznošenja ili pronošnja, kojom se umanjuje holokaust, zločin genocida ili zločin protiv čovječnosti trivijaliziraju ili uljepšaju, da se umanji broj žrtava ili da se oni predstave kao događaj ili skup događaja sa pozitivnim, korisnim ili prihvatljivim karakteristikama i ishodom.

7. **Opravađanje** predstavlja svaku izjavu, radnju i aktivnost a naročito svaki usmeni, pismeni, audio, vizuelni ili elektronski materijal bez obzira na sadržaj, oblik ili način iznošenja ili pronošnja, kojim se opravdava holokaust, zločin genocida ili zločin protiv čovječnosti, a kako su ovi pojmovi definirani u ovom zakonu.
8. **Odobranje** predstavlja svaku izjavu, radnju i aktivnost, a naročito svaki usmeni, pismeni, audio, vizuelni ili elektronski materijal bez obzira na sadržaj, oblik ili način iznošenja ili pronošnja, kojim se odobrava holokaust, zločin genocida ili zločin protiv čovječnosti, a kako su ovi pojmovi definirani u ovom zakonu.
9. **Javni službenik** je svako lice koje je zaposleno u javnom organu.
10. **Javni organ** je organ odnosno pravno lice u Federaciji Bosne i Hercegovine, i to: organ zakonodavne vlasti, organ izvršne vlasti, organ sudske vlasti, organ uprave.

### Član 3.

Ovaj zakon se tumači na način da se primjenom njegovih odredaba u najvećoj mogućoj mjeri obezbjeđuje princip slobode izražavanja.

### Član 4.

(1) Ko negira, osporava, minimizira, opravdava ili odobrava holokaust, zločin genocida ili zločin protiv čovječnosti čini krivično djelo u smislu člana 20 Krivičnog zakona Federacije Bosne i Hercegovine („Službeni list FBiH“, br. 36/03 sa važećim ispravkama, izmjenama i dopunama), i kaznit će se kaznom zatvora u trajanju između osam dana do tri godine i novčanom kaznom u iznosu između 3.000 i 10.000 konvertibilnih maraka.

(2) Ko krivično djelo iz prethodnog stava počini u svojstvu javnog službenika, ili zloupotrebom položaja ili ovlasti, ili ako je zbog tog djela došlo do nereda, nasilja ili drugih teških posljedica za život građanki i građana FBiH, kaznit će kaznom zatvora između šest mjeseci i tri godine i novčanom kaznom između 5.000 i 10.000 konvertibilnih maraka.

(3) Višestruki počinioci krivičnog djela iz stava 1) ovog člana kaznit će se kaznom zatvora između jedne i tri godine i novčanom kaznom između 10.000 i 15.000 konvertibilnih maraka.

### Član 5.

(1) Ko distribuira ili na drugi način — kroz kompjuterske, medijske, elektronske ili druge sisteme i načine — učini javnosti dostupnim materijal ili sadržaj kojim se ciljano negira, osporava, minimizira, opravdava ili odobrava holokaust, zločin genocida ili zločin protiv čovječnosti, čini krivično djelo u smislu člana 20 Krivičnog zakona Federacije Bosne i Hercegovine („Službeni list FBiH“, br. 36/03 sa važećim ispravkama, izmjenama i dopunama), i kaznit će se kaznom zatvora u trajanju do tri godine, ili novčanom kaznom u iznosu između 3.000 i 10.000 konvertibilnih maraka.

(2) Ko krivično djelo iz prethodnog stava počini u svojstvu javnog službenika, ili zloupotrebom položaja ili ovlasti, ili ako je zbog tog djela došlo do nereda, nasilja ili drugih teških posljedica za zajednički život građanki i građana FBiH, kaznit će kaznom zatvora između šest mjeseci do tri godine, i novčanom kaznom između 5.000 i 10.000 konvertibilnih maraka.

(3) Višestruki počinioci krivičnog djela iz stava 1) ovog člana kaznit će se kaznom zatvora između jedne i tri godine i novčanom kaznom između 5.000 i 10.000 konvertibilnih maraka.

#### **Član 6.**

U slučaju presude na osnovu ovog zakona, može također biti naređeno da se presuda, u cjelini ili djelimično, objavi u jednom ili više sredstava javnog informisanja o trošku počinioca krivičnog djela definiranog ovim zakonom.

#### **Član 7.**

U slučaju presude na osnovu ovog zakona, počiniocu krivičnog djela definiranog ovim zakonom se može naložiti da poduzme sve potrebne mjere da ublaži štetu uzrokovanu negiranjem, minimiziranjem, opravdavanjem ili odobravanjem holokausta, zločina genocida ili zločina protiv čovječnosti.

#### **Član 8.**

Ovaj zakon stupa na snagu osmog dana od dana objavljivanja u „Službenim novinama Federacije Bosne i Hercegovine“.

PREDSJEDAVAJUĆI DOMA NARODA  
PARLAMENTA FEDERACIJE BOSNE I  
HERCEGOVINE

PREDSJEDAVAJUĆI  
PREDSTAVNIČKOG DOMA  
PARLAMENTA FEDERACIJE BOSNE I  
HERCEGOVINE

## OBRAZLOŽENJE

Prijedlog zakona o zabrani negiranja, minimiziranja, opravdavanja ili odobravanja holokausta, zločina genocida i zločina protiv čovječnosti sastavljen je s ciljem ostvarivanja napora Parlamenta Federacije Bosne i Hercegovine da zakonski regulira problematiku negiranja sudski utvrđene pravne istine o najtežim zločinima.

Ovim zakonom uređuje se sankcionisanje negiranja, osporavanja, minimiziranja, opravdavanja ili odobravanja holokausta, zločina genocida i zločina protiv čovječnosti, te postavljaju širi osnovi u odnosu na ranije izmjene važećeg zakonodavstva u kontekstu zabrane negiranja počinjenih zločina.

Slični prijedlozi su se već našli u zakonodavnoj proceduri na razini Parlamentarne skupštine Bosne i Hercegovine, ali za njihovo prihvatanje nije bilo političke volje. S tim u vezi, smatram da je potrebno da Parlament Federacije ponovno pokrene ovu temu.

Dužni smo da pokrenemo ovaj proces, pridržavajući se međunarodnih obaveza prema Generalnoj skupštini Ujedinjenih nacija, kao i uvažavajući međunarodnu praksu zemalja Evropske unije po pitanju zabrane negiranja holokausta, genocida i zločina protiv čovječnosti.

Zakon obuhvata negiranje, osporavanje, minimiziranje, opravdavanje ili odobravanje onih zločina koji su utvrđeni od Međunarodnog vojnog tribunala (Nimberškog tribunala), Međunarodnog krivičnog suda, Međunarodnog krivičnog suda za bivšu Jugoslaviju, drugih sudova i tribunala čiju nadležnost BiH priznaje, kao i onih zločina utvrđenih u presudama Suda Bosne i Hercegovine.

S poštovanjem,



**Dennis Gratz**

**Zastupnik u Predstavničkom domu Parlamenta Federacije BiH**

**Naša stranka**

DOSTAVLJENO:

- Naslovu
- Parlamentu FBiH – Predstavnički dom i Dom naroda Parlamenta FBiH
- Stručnoj službi Parlamenta FBiH – n/r predsjednika klubova poslanika parlamentarnih stranaka
- Vlada FBiH
- Ministarstvo pravde FBiH
- Evidencija